


02 FEBROARY 2023



Ankehitriny ry Tompo vao alefanao am-piadanana araka ny teninao ny mpanomponao fa ny masoko nahita ny famonjena avy aminao

Ry Kristianina havana, izao 02 febroary izao no ankalazantsika ny nanolorana ny Tompo tao an-tempoly izay antsointsika hoe fetin'ny Jiro masina. Fanamasinana ny jiro masina, izay mahatonga antsika rehefa manomboka ny lamesa manao ny fitondrana ny jiro ao amin'ny Eglizy. Nefa tsara ny mitadidy ary efa naverina matetika amintsika fa tsy manao "théâtre" na fampisehoana isika raha manao izany fihetsika izany fa litorjia izany hoe asan'Andriamanitra ka mivelona izay ankalazaintsika isika. Tsy hoe mahatsiaro fotsiny fa noho ny asan'ny FANAHY MASINA ao amintsika dia sady mankalaza no mahatsiaro isika ka mivelona an'izay ankalazaina. Aoka àry tsy ho variana amin'ny zavatra ety ivelany isika fa ny ambaran'ny fihetsika sy ny zavatra ataontsika.

Vakiteny : **Malakia 3,1-4.**
Tononkira : Sal. 24
Evanjely : **Lioka 2,22-40.**

Androany dia mahatsiaro ny nanolorana ny Tompo tao an-tempoly isika, raha ny marina kokoa dia Izy no nanolotra ny tenany, Izy ilay fahazavana ka izany no mahatonga antsika androany maneho an'izany amin'ny alalan'ny fitondrana ny jiro miditra ao an-deglizy.

Isika avy nandray ny fahazavan'i Kristy dia zary fahazavana eo anivon'ny mpiara-belona ka mahatonga antsika ihany koa hanilo ny hafa tahaka an'i Kristy izay natolotra tao an-tempoly.

Io no mahatonga an'i Simeona milaza ao amin'ny evanjely fa izy Kristy no fahazavana ka izay mandray azy dia lasa fahazavana tokoa saingy fanafintohinana kosa ho an'izay tsy mandray azy

izany. Ambarany amintsika ny tena dikan'izao zavatra izao, rehefa nahita maso an'i Jesoa sy nitrotro azy teo an-tanany i Simeona dia nilaza fa io ilay fahazavana hanilo ny olona rehetra sady voninahitr'Andriamanitra : *"Ary nitso-drano azy ireo i Simeôna, ka nilaza tamin'i Maria Renin'ny Zaza hoe: "Indro ity Zaza ity no voatendry ho fandavoana sy ho fananganana ny maro amin'i Israely ary ho famantarana hotoherina, ary ny fanahinao aza hotanterahin-tsabatra mba hiseho ny hevitra ny fo maro"*.

Izany no ankalazaintsika androany 02 febroary dia i Jesoa manilo an'izao rehetra izao.

Fampianarana lehibe ho antsika ihany koa ny fahafahan'i Simeona sy Ana afaka nandray ny fahazavana satria olona mivavaka izy ireo, olona miray fo tanteraka amin'Andriamanitra, tao amin'izy ireo ny Fanahy Masina ka afaka nandray an'i Jesoa ka nahita ny fahazavana izy ireo.

Ry Kristianina havana, tsy afaka handray ilay fahazavana isika raha tsy ny fontsika no miova, raha mbola "encombré" araka ny averimberintsika matetika. Raha mbola ao anatin'ny fontsika ao ny fialonana, ny fihatsarambelatsihy, ny adiady, ny fitiavan-tena, ao anatintsika ao ny harena tsy izy satria ny harena tokana dia Andriamanitra, feno ny fontsika ka tsy misy toerana ho an'i Jesoa intsony, maizina isika ka tsy afaka handray azy.

Amin'izao fankalazana an'i Jesoa natolotra ao an-tempoly izao, ny marina kokoa dia izy nanolotra ny tenany amin'ny maha-Andriamanitra azy, hoy isika, mba ho fahazavana ho antsika olombelona. I Jesoa dia olombelona feno tanteraka tokoa noho izy nanaiky ireo lalàna mametra azy amin'ny maha-olombelona azy satria araky ny lalan'i Moizy dia tsy maintsy atolotra ao an-tempoly ny zaza voalohany rehetra. Nanaiky an'izany izy, io no manambara fa olombelona izy ary ny maha-olombelona azy no nentiny namonjeny antsika. Nanaiky ho fahotana izy izay tsy mpanota mba hanafaka antsika amin'ny fahotana ka izany no fahazavana. Raha mandray azy isika dia afaka handeha amin'ny fahazavana. Izany no ambaran'ny vakiteny voalohany ao amin'ny bokin'i Malakia mpaminany : *"tonga ao an-tempoly ny Tompo tadiavinareo"*. Tanteraka ao amin'ny fiainantsika izany hafatra izany satria isika no tempolin'Andriamanitra, isika no Eglizy. Azontsika ognona àry no mahatonga antsika manao izao Sinaody izao hahatonga ho Eglizy isika tsiraikiraiky, ny fianakaviana ho Eglizy kely tokoa. Raha isika àry no mahatsapa fa Eglizy tokoa dia afaka mitondra an'ilay fahazavana eo amin'ny manodidina antsika izay ambaran'ny mpanoratra ny taratasy ho an'ny Hebrio : *"tsy maintsy mitovy amin'ny rahalahiny amin'ny zavatra rehetra izy, hamonjeny ireo rahalahiny"*, nanaiky ho tonga olombelona i Jesoa mba ho fanilo sy fahazavana ary izany no fanavotana ho antsika. Raha miditra amin'ny fiainantsika tokoa i Jesoa dia hanavao ny fiainantsika izy ka hanavao ny fianakaviansika, ny fiaraha-monina misy antsika, ny tontolo manodidina antsika.

Araka ny fantantsika dia nofidin'i Papa Md Jaony Paoly 2 ho andron' ny Voatokana androany, nofidiny izany mba hahafahana mivavaka ho azy ireo manokana sy handinihan'izy ireo koa fa famantaram-pitiavana izy ireo araka ny vavaka ataontsika mikasika ny vòkasiona. Io fitiavana

io no tena fahazavana ary izay no andrasana amin'ny voatokana ho "famantaram-pitiavana". Matoa i Jesoa manolo-tena dia satria ao anatin'ny fitiavana. Manolotra ny tenany koa ireo Voatokana natokana ho an'Andriamanitra tahaka an'i Jesoa mba ho famantarana ny fahazavana amin'ny alalan'ny fiainany manontolo miseho amin'ny fahafoizana sy fanompoana. Mahafoy ho an'Andriamanitra izy ireo ka mahafoy, manompo ny olombelona rehetra tsy misy avakavaka. Tsara koa ny manamarika fa ny diakra, ny pretra sy ny eveka dia voatokana ihany koa fa samihafa noho izy ireo mandray fanamasina izany hoe mandray ny sakramenta. Tsy sakramenta ny voady ataon'ny relijiozy satria mivelona manontolo ny fiombonana amin'i Jesoa ka efa misantatra sahadry ny fiombonana feno any an-danitra.

Ry Kristianina havana amin'izao vanim-potoanan'ny Sinaody izao no taona andalinantsika ny finoana mba hahatonga ho Kristy mpiara-belona amin'ny olona hahatonga antsika ho Eglizy Olo Velo velomin'ny Batemy miombona miara-dalana mandray an-tanana zary Tabernakla velona". Hitantsika eto fa tsy irery isika. Manolo-tena sy miara-dàlana amintsika I Jesoa. Anjarantsika rehefa avy mibanjina ny fiainany dia afaka mivelona sy manaraka ny fiainany mba ho fiainana kristianina tokoa ny hiainantsika satria isika Kristianina dia avy amin'i Kristy, amin'izay koa isika handray azy tahaka an'i Simeona sy Ana. Mandray Azy no ataontsika amin'ny Eokaristia, izy no fahazavana, isika koa manolotra ny tenantsika, manome ny tenantsika, izay midika fa mahafoy sy manompo an'ireo manodidina antsika, izany ny fiainan'ny Voatokana.

Ry Kristianina havana, aoka mba hivelona bebe kokoa an'izao andro lehibe izao isika, andron'ny jiro masina, antoky ny fahazavana dia i Kristy. Isika no jiro masina eo amin'ny mpiara-belona amintsika, hitondra ny fahamarinan'i Kristy isika, hampanjaka ny rariny sy hitsin'i Kristy, hivelona ny fitiavan'i Kristy ka ho mpampihavana isika amin'ny ataontsika rehetra, haneho ny fihavanana sady kristianina no malagasy. Zary Fahazavana isika raha ataontsika tena fiainana ny teny faneva amin'izao Sinaody tapany faharoa izao : Fianakaviana Eglizy kely miaro ny tontolo iainana. Zary fahazavana tokoa isika raha samy vonona hamboly hazo sy hiaro ny tontolo iainana mba hanambarana fa famantaram-pamonjena tokoa ny fiainantsika manontolo. Aoka àry amin'izao andron'ny voatokana izao hankinintsika amin'i Masina Maria sy Md Josefa ireo voatokana ireo ka hanolotra ny tenany tokoa amin'i Jesoa ka zary fahazavana sy fanilo, ho famantaram-pitiavana. Amena

Mompera Arseveka Mgr Benjamin Ramarason